

Mapabaxutoje San Pablo copiaya toyaquina Timoteojavabelia

Pacuenia Pablo mapabaxutoje toyaquina Timoteojavabelia yabara pelivaisi

1 ¹ Xanë Pablonë, Jesucristo pijaapóstolenënë. Dioso, ponë nacacapanepaejitsia, bajaraponë nitoroba pijacue tatonacuenebine-xa. Vajatuxanenë Jesucristo, ponë pejamatabëcueneta Dioso nacacapanepaejitsia, bajaraponë ata nitoroba pijacue tatonacuenebine-xa. ² Timoteo, bepepo taxënatomë tacataenë, Jesucristo pelivaisi xamë ata nejumecovënëtsixae. Catoyaquinatsi mapabaxutoje. Catovajëtatsi vaxa Diosojavabelia, vajatuxanenë Jesucristojavabelia ata, pecayavenonaenexabeje pecaasivaxaebeje. Catovajëtatsinua bajaraponëbeje pecaitaxutotsoniataenexabeje pecajamatabëcuene xanepanaeyaexanaenexabejenua.

Pacuenia Pablo itoroba Timoteo pejumeitavetsinexa penajumetsënëtsilivaisi petsipaebaponaevi yabara pelivaisi

³ Pamatacabi baja ponajë Macedonia nacuyabelia, capuenetatsi neponaponaenexa Efeso tomarata. Nexata icatsia matavëjëa caitorobatsi tsiteca abaxë neponaponaenexa bajarajota. Tsipaji itsamonae bajarajota tsipaebavanapa saicayacuenia Dioso pejumelivaisivecua. Palivaisi tsipaebavanapa bajarapamonae, apo pexaniajailivaisi cajena. Jumeitavetsianame bajarapamonae matavëjëa baja petsipaebaponaeyaniva bajarapalivaisi. ⁴ Itavetsianamenua bajarapamonae penajamatabëxainabiabiyaniva saya jemalivaisixi, perujulivaisiximi. Itavetsianamenua pijasalinaivimi pevënëxi yabara ata penajamatabëxainabiabiyaniva. Bajarapitsilivaisixi ajumematomobi baja cajena itsa nabarëcuaicuaijai tsaponae jivi. Bajarapalivaisixi apo nacajamatabëcueneyavenonae tsipae pacuenia Dioso nacaitoroba jumecovënëtsiaya vajatoexanaenexa.

⁵ Bajarapacuenia caitorobatsi nejumeitavetsinexa bajarapamonae pecopatsinexa bajarapalivaisi pecuaicuaijaitsabiabijava. Nexata juya

pexanaenexa pacuenia Dioso jitsipa. Dioso cajena jitsipa jivi pejamatabëëthëtovetsina jamatabëcuenexanepanaeya namataenetsia penaasiva-tsavanapaejava. Dioso jitsipanua jivi pejinavanapaenexa aneconijibia Dioso pitabarata. Dioso jitsipanua jivi pejamatabëëthëtovetsina xaniavaetsia pejumecovënëtanapaenexa Dioso pejumelivaisi. ⁶Bajarapamonae pacuenia Dioso jitsipa apo pexanavanapaexae, Dioso pejitsipaejavami vecuanajamatabëcuenemuxufeta. Nexata jamatabëcuenenaxuaba natsiquejemalivaisixi pecuaicuaijaittsabiabinexa. ⁷Bajarapamonae picani jamatabënaexana jivi livaisi petsipaebabiabivinexa. Palivaisi Dioso Moiséspijinëta najumecopata, bajarapalivaisi picani jivi asaëya jamatabëtsipaebapona. Itsiata baitsi jane bajarapamonae apo jumeyapëtae pajamatabëcuenelivaisi xaina bajarapalivaisi.

⁸Vaxaitsi baja cajena yapëtanetsi pexanepanaecuene palivaisi Dioso Moiséspijinëta najumecopata. Bajarapalivaisi Dioso nacatocopata vajatsipaebinexa jivijavabelia, jivi peyapëtaenexa penaneconitsicuene Diosojavabelia. ⁹Pamonae pexaniacuene exanavanapa, apo toyaquinabiabitsi pitavetsilivaisinexatsi. Biji rajane pamonae pibisiacuene exanavanapa, toyaquinabiabatsi pitavetsilivaisinexatsi. Pamonae ata apo yaiyatae itsacuenejavayo ata Dioso pijacuene, toyaquinabiabatsi pitavetsilivaisinexatsi. Pamonae ata najamatabëcuenebijiana Dioso pijacuenevecua, toyaquinabiabatsi pitavetsilivaisinexatsi. Pamonae ata jivibeve, paxa ata, pena ata, pebeyaxuabivi, toyaquinabiabatsi pitavetsilivaisinexatsi. ¹⁰Pamonae ata pijavajivi vecuanamatayajita itsavajavabelia, toyaquinabiabatsi pitavetsilivaisinexatsi. Pamonae ata pevëna pebijavabelia pevitota pibisiacuene exana, toyaquinabiabatsi pitavetsilivaisinexatsi. Bajara pijinia pacuenia petiriavi ata. Pamonae pamonajivi vecuanamatayajita itsanëjavabelia, toyaquinabiabatsi pitavetsilivaisinexatsi. Pamonae ata pevëna petirivijavabelia pevitota pibisiacuene exana, toyaquinabiabatsi pitavetsilivaisinexatsi. Pamonae ata jivi nacobetoxotsiaya pita, toyaquinabiabatsi pitavetsilivaisinexatsi. Pamonae ata najumetsënëta, toyaquinabiabatsi pitavetsilivaisinexatsi. Pamonae ata itsamonae yabara najumetsënëtsiaya baracuaicuaijai tsabiabi, toyaquinabiabatsi pitavetsilivaisinexatsi. Pamonae ata apo jitsipae pexaniajailivaisi jivi petsipaebaponaenexa, toyaquinabiabatsi pitavetsilivaisinexatsi. ¹¹Bajarapalivaisicuenia xanë ata itavetaponajë itsa tsipaebaponajë palivaisi Dioso netocopata jivi tatsipaebaponaenexa. Bajarapalivaisi itsa tsipaebaponajë, tsipaebaponajë daxitajivi peyapëtaenexa pacuenia Dioso itaxutotsoniatanetsi pecapanepaenexatsi.

**Pacuenia Pablo pexaniajamatabëcuene rajuta
Jesucristojavabelia yabara pelivaisi**

¹²Pexaniajamatabëcuene rajutajë vajatuxanenë Jesucristojavabelia tanerajutsixae pesaë tatonacuenebinexa. Jesucristo

nesivanajamatabëxaina xaniavaetsia tatonacuenebinexa. Bajaraxuata pexaniajamatabëcuene rajutajë. ¹³Copiata abaxë itsa apo jumecovënëtsinë Jesucristo, pibisiacuenia picani baracuaicuaijanë tsabiabi Jesucristo. Pijajivi ata tobarajinabiabajë tabejiobiaexanaenexa. Pibisiacuenia bija-taeyabiabajë Jesucristo pijajivi. Bajarapacuenia taexanabiabinë ata, Dioso itsiata nebejiobiatane. Tsipaji jamatabëcuenenavëxaniabiaya bajarapacuenia exanabiabajë. Apo yapëtaenë picani xua exanaponajë Jesucristojavabelia. Tsipaji abaxë apo jumecovënëtsinë Jesucristo Dioso pexënatocuene. ¹⁴Nexata baja itsiata belia vajatuxanenë Jesucristo pinijicuenia neyavenona tanajamatabëcuenecopatsinexa bajaraponëjavabelia. Bajaraxuacujinae pijajivitonëxaenë, neyavenona tasivanexa itsamonae ata.

¹⁵Mapalivaisije pacatsipaebijitsiatsi. Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta mapalivaisije. Jesucristo baja cajena patsica mapanacuayabetsicaje pibisiacuenia pexanaevimi pecapanepaenexa Disojavabelia. Xanë ata picani bitso pibisiacuenia taexanaenëmi daxitajivi matatoxenetsia. ¹⁶Xanë itsiata bajara taitsinëmi ata, Dioso itsiata nebejiobiatane. Bajarapacuenia Dioso nebejiobiatane daxitajivi peyapëtaenexa Jesucristo bajayajebi tanesivaajamatabëcuenesaëjava tajumecovënëtsinexa, pibisiacuenia taexanaenëmi ata. Nexata pamona bexëjavabelia ata Jesucristojavabelia najamatabëcuenecopataponaena, xainaena matabi apo pevereverecejava. Bajarapamonae nesivaajamatabëcuenesaë tsane itsa nevënëlivaisitaena Jesús taneitapetsijava pijajivitonëxanë, pibisiacuenia bitso taexanabiabinëmi ata. ¹⁷Bajaraxuata vaxaitsi pepo Dioso, daxitacuenia peyapëtaenëjavabelia, jumaitsi tsabiabi: “Xamë Diosomë bitso ayaijamatabëcuenenëmë. Bitso ayaicuenia nexanaenë,” jaitsi tsabiabi. Bajaraponë Dioso daxitacuenia peyapëtaenë. Pepo pevetsinënua daxitacuenia. Apo petëpae-nëxanua daxitamatacabijavabelianexa. Apo petanëtsinua itsajivi ata.

¹⁸Timoteo, betaxënatomë tacataenë. Pacuenia caitorobatsi, exanaename. Bajayata baja cajena itsamonae Dioso pejumecovënëtsivi Dioso pejamatabëcueneta tajëvelia cavajunupaeba pacuenia exanaejitsiamë. Bajarapacuenia Dioso asaëyata tocanacuenebaponare mapalivaisije. Nexata bajarapacuenia Dioso pitorobilivaisi daxitajivi yapëtaena. Catoayapëbeje ata dovathi pecajamatabëcuenëejëtsixae, ajamatabëcuenesaëmëre Disojavabelia nenajamatabëcuenecopatsijava. Exanabiabare xua yapëtaneme pexaniajaicuenia nenajamatabëcuenebijianaeyaniva Diosovecua. ¹⁹Itsamonae baja yapëtae ata pacuenia Dioso itorobatsi, itsiata pibisiacuenia exana. Nexata bajarapamonae Diosovecua naxuabiana pecopabixae Cristo pejumecovënëtsijavami. ²⁰Bajarapamonaeyajuvënënebeje Himeneobeje Alejandrobeje. Pibisiacuenia Dioso baracuaicuaijibeje tsabiabi. Nexata pecopatsinexabeje Dioso pebaracuaicuaijijavabeje,

bajaraponëbeje copatajë dovathijavabelia. Nexata bexëa itsa najamatabë-xainabeje pexanialivaisi, xaniavaetsia jane baja Dioso pejumecovënëtsi-nexabeje.

**Pacuenia Dioso pejumecovënëtsivi daxitajivi
betovajëta Diosojavabelia yabara pelivaisi**

2 ¹Timoteo, copiaya caitorobatsi mapacueniaje. Caitorobatsi paneto-vajëtabiabinxaxa daxitajivi Diosojavabelia. Daxitajivi Diosojavabelia patovajëtabiabianame pitaxutotsoniataenexatsi Dioso. Itsa baja Dioso itaxutotsoniataenatsi bajarapamonae, nexata pexaniajamatabëcuene parajutsianame Diosojavabelia bajarapamonae yabara. ²Patovajëtsianamenua Diosojavabelia presidentevi ata. Patovajëtsianamenua daxita gobiernopijalivaisi pevetsivi ata. Bajarapacuenia patovajëtsianame bajarapamonae Dioso peyavenonaenexatsi. Nexata xaniavaetsia jinavanapaenatsi avajabitsaëjibia. Nexata xaniavaetsia Dioso jumecovënëtavanapaenatsi. Nexata exanavanapaenatsi ëpexaniacuene. ³Bajarapacuenia Diosojavabelia daxita bajarapamonae vajatovajëtsijava, xanepana Dioso, ponë nacacapanepaejitsia, vajanacasivabarëyanexa. ⁴Bajarapacuenia daxitajivi vajatovajëtsijava Dioso jitsipa. Tsipaji Dioso jitsipa daxitajivi pecapanepaenexa bajaraponëjavabelia. Dioso tojitsippanua daxitajivi peyapëtaenexa pexaniajailivaisi, Jesucristo pelivaisi. ⁵Nexata daxitajivi itsa yapëtaenapexaniajailivaisi, Jesucristo pelivaisi, yapëtaenanua pacuenia caenë Dioso daxitajivi capanepaejitsia. Yapëtaenanua pacuenia pijinia caenë Jesucristo daxitajivi petocuaicuaijainënexa Diosojavabelia. ⁶Jesucristo rabaja nacopata pebeyaxuabinexatsi. Nexata Jesucristo petëpaejavata, daxitajivi pijaneconimi matamota. Bajarapacuenia daxitajivi peyapëtaenexa, Dioso pecaëjëtsimatacabita pijajivi itoroba daxitanacuanëjava pexaniajailivaisi jivi petsipaebinxaxa. Tsipaji baja cajena Dioso jitsipa daxitajivi pecapanepaenexa. ⁷Bajarapalivaisi jivi tatsipaebinxaxa Dioso nitoroba. Dioso nitoroba bajarapalivaisi tatsipaebinxaxa pamona apo judfovi ata penajamatabëcuene copatsinexa Diosojavabelia. Nexata pexaniajailivaisi jivi tatsipaebijava, itsa canavajunupaebatsi, xaniajanë cajena. Cristo taju-mecovënëtsinëxaxa, pexaniajailivaisi jivi tsipaebaponajë. Apo najumetsë-nëtsinë cajena.

⁸Bajaraxuata daxitanacuanëjava pebijivi, pamona baja Dioso pitabara-ta aneconijibi, itsa vajëta Diosojavabelia, jitsipajë nacobeyotsiaya pevajëtsijava Diosojavabelia. Bajarapamonae bevajëta Diosojavabelia anaepa-naenejeva itsajiviyojavabelia, jumeanaenotsinejevanua itsajiviyojavabelia. ⁹Jitsipajë pijinia petiriavi penaxatabinxaxa xanepanaeya. Pëtsa bitso naitabëtsiaya naxataba. Itsa naxaniavaeta, bitso pëtsa namataitabëta pexania-cuenia. Pëtsa bitso naitabëta oronanitota pexanaejavanëta. Pëtsa naitabëta penamatamotsiviriaibotoxita ata. Pëtsa naitabëtsiaya naxataba bitso

penamatamotsinavanë ata. ¹⁰Petiriavi, pamonaë baja xaniavaetsia najamatabëcuenecopata Diosojavabelia, pëtsa naitabëta bitso. Bajarapamonaë Dioso pitabarata pexaniacuene betoexanabiaba itsamonaëjavabelia penajamatabëcuenetitabëtsinexa bëpënëajavaverena. ¹¹Dioso pejumecovënëtsi-vi itsa nacaetuata Dioso pejumelivaisi penamuxunaevetsinexa, petiriavi beveliajamatabëcuenevi nataeya ajumeljibia benamuxunaevetena pejumecovënëtsinexa palivaisi tsipaebatsi. ¹²Petiriavi apo tocopatsinë pemuxu-jobinexa pebijivi. Apo tocopatsinëua petiriavi beayaijamatabëcuenevi nataeya pitorobabiabinexa pebijivi. Biji rajane petiriavi beveliajamatabëcuenevi nataeya ajumeljibia benamuxunaevetena. ¹³Bajarapacuenia itorobajë tsipaji copiaya Dioso exana pebi. Bajaraponë pevënë Adán. Bajaraxuacujinae cotocaevi Dioso exana petiriva. Bajarapova pevënë Eva. ¹⁴Adán cajena picani dovathi apo yamaxëitojorobitsi. Biji rajane copiaya petiriva dovathi yamaxëitojorobatsi. Nexata petiriva copiaya pibisiacuene exana. ¹⁵Bajaraxuata daxita petiriavi Dioso tocopatatsi pevixaeitonotsinexatsi penacueto itsa vecuanaexanatsi. Itsiata baitsi jane bajarapamonaë capanepaenatsi Diosojavabelia itsa casaë tsane penajamatabëcuenecopatsijava Diosojavabelia. Capanepaenatsi Diosojavabelia daxitajivi ata asivaya itsa taena, Dioso ata asivaya itsa taena. Capanepaenatsi Diosojavabelia xaniavaetsia itsa jinavanapanua pacuenia Dioso tojitsipatsi.

Pacuenia ancianovinexa bejamatabëcuenetsi yabara pelivaisi

3 ¹Pexaniajailivaisi cajena maje. Ponë jitsipa pitapetsinexatsi ancianonënexa, Dioso pejumecovënëtsivi pevetsinënexa, bajaraponë pexaniacuene, Dioso pijacuene, jamatabëtonacueneba. ²Ancianonënexa, xanepana ponë apo xainae itsacueneneconi ata, paneconi yabara itsamonaë neconitsijitsiatsi. Caevayo pepitsinë. Penajamatabëcuenereviabinë. Xaniavaetsia penajamatabëxainanë. Peyaiyataenëtsi. Xaniavaetsia pecopiapitabiabinë pijaboyaberena pesivaxainaeitsi. Pecaëjëpaenëtsi xaniavaetsia jivi Dioso pejumelivaisi petsipaebinexa. ³Ancianonënexa, xanepana ponë apo piapaenë piaitajibinexa. Pevëna pebi apo pebenë. Apo pejitsipaenë itsajivi ata yamaxëitojorobiaya palata pevecuanacobetoxotsinexa. Biji rajane ancianonënexa xanepana ponë pexaniajamatabëcuenenë. Anaeya itsajivi ata apo pejumepitsinë pebarënajumeanaenotsinexa. Bitso pexainanexa ata pexinaejava, apo penajamatabëxainanë. ⁴Ancianonënexa, xanepana ponë xaniavaetsia eveta pexi, pijava yajava. Pexi pejumecovënëtsinëtsi. Pejumeyaiyataenëtsinua. ⁵Ponë apo caëjëpaetsi xaniavaetsia pexi pevetsinexa, pijava yajava, nexata bajaraponë apo caëjëpae tsipaetsi pevetsinexa Dioso pejumecovënëtsivi. ⁶Apo xanepanaë tsipae ancianonënexa ponë abaxë ajena jumecovënëta Dioso. Beayaijamatabëcuenenë itajara nataejitsipa bajaraponë. Nexata epatua Diosovecua jopaejitsipa. Bajarapacuenia bajayata dovathi penajamatabëxainanë, Dioso vecuajopaica. Nexata dovathi

daxitamatacabijavabelianexa naneconita Diosojavabelia. ⁷Ancianonënexa, xanepana ponë peyaiyataenëtsi pamonaе Dioso apo pejumecovënëtsivi ата. Bajarapitsinë xanepana ancianonënexa ancianonë pexanaecujinaetsi jivi pequenetsiataeyanivatsi, dovathi ата peyamaxëitojorobiyanivatsi.

Pacuenia diáconovinexa bejamatabëcueneitsi yabara pelivaisi

⁸Diáconovinexa pijinia, xanepana pamonaе penajamatabëcuenerevivi. Itaxutojema apo pecuaicuaijivi. Apo piapaevi piaitajibinexa. Apo pejitsipaevi itsajivi ата yamaxëitojorobiaya palata pevecuanacobetoxotsinexa. ⁹Diáconovinexa, xanepana pamonaе xaniavaetsia najamatabëcuenecopata Cristojavabelia. Pejamatabëëthëtota peyapëtaevi pexaniajaicue-ne palivaisi jumecovënëta. ¹⁰Pamonaе diáconovinexa, copiaya bitorobatsi itsacuenejavayo pevetsinexa bajarapacuenia pejamatabëcueneëjëtsinexatsi. Nexata xaniavaetsia itsa eveta xua evetsiaexanatsi, diáconovi jane baja bexanatsi. Nexata jane baja bitorobatsi penacuenebinexa xua diáconovi banacueneba. ¹¹Diáconovi pijinia pijavajivi xanepana penajamatabëcuenerevibinexa, apo bebaracuaicuaijai itsamonaе. Xaniavaetsia benajamatabëxaina. Nexata xaniavaetsia bexanabiaba pacuenia itorobatsi. ¹²Diácononënexa, xanepana ponë caeva pepitsinë. Pecaëjëpaenëtsinua xaniavaetsia pevetsinexa pexi, pijava yajava. ¹³Diáconovi xaniavaetsia itsa eveta penacuenebijava, nexata diáconovi xaniavaetsia yaiyataenatsi daxitajivi. Ajumeurajibianua jivijavabelia navajunupaebiana Jesucristojavabelia penajamatabëcuenecopatsijava.

**Pacuenia Timoteo toyaquinatsi peyapëtaenexa
pacuenia exanaponaponaejitsia Dioso
pejumecovënëtsivi tuatuajëta yabara pelivaisi**

¹⁴Timoteo, bepijia picani jamatabëponajë xamëjavabelia tacataenexa. Itsiata tavajënaeyabelia catoyaquinatsi mapacuenе yabaraje. ¹⁵Nexata abaxë itsa cuenenajematsianajë tapatsijava xamëjavabelia, neyapëtaenexa pacuenia exanaponaponaejitsiamë Dioso pejumecovënëtsivi tuatuajëta. Pamonaе baja Dioso pejumecovënëtsivi, Dioso rabaja piasaënë pijajivi. Bajarapamonaе Dioso pejumelivaisi, pexaniajailivaisi, xaniavaetsia baja jumecovënëtavanapa. Daxita nacuanëpijivi ата pejumecovënëtsinexa bajarapalivaisi. Bajarapamonaе pexaniajailivaisi itsamonaеjavabelia tsipaebapona. Bajarapamonaе apo tocopatsinua itsajivi ата pexaniajailivaisivecua saicayalivaisi pejumecovënëtsiyaniva. ¹⁶Pepo pexaniajailivaisi cajena Cristo pelivaisi. Bajaraponë baja vaxaitsi jumecovënëtavanapatsi. Itsiata baitsi jane itsamonaе apo jamatabëcueneyapëtaе bajaraponë. Bajaraponë Cristo ayaijamatabëcuenenë bitso:

Bajaraponë Cristo mapanacuata naexana bevaxaitsi jivitonëcuenia.
Espíritu Santo pejamatabëcueneta daxitajivi yapëtaeyaexanatsi

Cristo planeconijibinēcuene. Angelevi ata Cristo tanetsi. Cristo pijajivi vënēlivaipsipaebaponatsi daxitanacuanēpijivijava. Nexata daxitanacuanēpijivi najamatabēcuenecopabapona Cristojavabelia. Dioso pijanacuatatsia ata Cristo copiapitatsi.

Dioso pejumelivaisi pejumecovënētsijava pecopabivi yabara pelivaisi

4 ¹ Espiritu Santo baja cajena tajēvelia nacayapētaeyaexana pacuenia bexējavabelia itsamonae copabijitsia Dioso pejumelivaisi pejumeco-
vënētsijavami. Bajarapamonae nexata jumecovënētsiana penajumetsënē-
tsilivaisi petsipaebaponaevitsi. Nexata bajarapamonae asaēya jumecovē-
nētaaponae na itsamonae dovathi pejamatabēcueneta petsipaebilivaisitsi.
² Bajarapamonae namuxunaevetsiana penajumetsënētsilivaisi petsipaeba-
ponaevitsi, betsitapexaniajamatabēcuenevitsi itajara tsane, pibisiajamata-
bēcuenevi ata. Bajarapamonae tsipaebaponaena penajumetsënētsilivaisi.
Apo acueneura cajena tsane. ³ Bajarapamonae itavetsiana penacasabi-
cuene. Bajarapamonae itavetsiananua itsacuenejavanē jivi pexaeyaniva.
Dioso cajena daxitacuene pexaejava exanae ata, jivi pexaeyaniva apo
itavetsi. Bajaraxuata Dioso pejumecovënētsivi, pexaniajailivaisi peyapē-
taevi, jumai tsabiabi pexaejava yabara: “Xanepana rabaja,” jai tsabiabi
Diosojavabelia pexaejava pexaevajēnae. ⁴ Daxitacuene, xua Dioso exana
vajaxaejavanexa, pexaniacuene bitso. Nexata apo biatsobitsi itsacuene-
javayo ata Dioso pexanaejava. Biji rajane itsa pitatsi Dioso pexanaejava,
“Xanepana rabaja,” bejai tsabiabitsi Diosojavabelia vajanacarajutsixae
vajaxaejavanexa. ⁵ Bajarapacuenia Dioso pejumelivaisibaxutota pejumai-
tsixae, xanepana daxitacuene vajaxaenexa. Pexaniajamatabēcuenē rajuta-
tsi Diosojavabelia vajaxaejavanexa vajanacarajutsixae. Bajaraxuata Dioso
nacatoxanepanaeyaexana vajaxaejavanexa.

**Pacuenia Timoteo itorobatsi xaniavaetsia peponaponaenexa,
xaniavaetsia petsipaebinexanua Dioso pejumelivaisi, yabara pelivaisi**

⁶ Itsa tsipaebianame pexaniajailivaisi Dioso pejumecovënētsivi-
javabelia, penajumetsënētsilivaisi petsipaebaponaevi pejumecovē-
nētsiyaniva, nexata xaniavaetsia Jesucristo netonacuenebinē tsane.
Niajamatabēcuenesaēnexa nevajēnaeyabelia, asaēya jumecovënēta-
ponare palivaisi baja jumecovënētavanapatsi. Pexaniajailivaisi, Dioso
pejumelivaisi, palivaisi itsamonae catsipaeba, tsiteca asaēya jumecovē-
nētaaponapona. ⁷ Itsiata baitsi jane pētsa jumecovënētame mapanacua-
pijilivaisianēje, saya natsiquejemalivaisianē. Daxita nesaēta nacujaubare
xaniavaetsia neponaponaenexa Dioso pejitsipaecuenia. ⁸ Vajajumalixa
nepanaenexa, xanepana picani vajaperabēsaēta vajacujinaejinaejava.
Itsiata baitsi jane daxitacuenevecua xanepana bitso vajajinavanapaene-
xa pacuenia Dioso nacatojitsipa. Bajarapacuenē nacatoxanepana tsipaji

vajatëpaecujinae ata Dioso nacajamatabëcueneyavenonaena xaniavaetsia vajajinavanapaenexa. ⁹Bajarapalivaisi pexaniajailivaisi cajena. Nexata daxitajivi xaniavaetsia bejumecovënëta bajarapalivaisi. ¹⁰Bajaraxuata Dioso tonacuenebaponaponatsibeje. Casaëtsibeje tsaponaponae Dioso vajatonacuenebaponaponaejavabeje, itsamonae pibisiacuenia nacabija-taeyabiabi atabeje. Bajarapacuenia exanatsibeje tsipaji najamatabëcuenecopatatsibeje piasaënë Diosojavabelia. Bajaraponë Dioso daxitajivi pecapanepaenë pijaneconivecua. Dioso capanepaena daxita pamonaе najamatabëcuenecopata bajaraponëjavabelia.

¹¹Bajarapalivaisi tsipaebaponare. Itorobaponarena bajarapacuenia pexanaenexa. ¹²Pëtsa nacopatame pevëjëatoxaemë itsajivi ata pecaquensiatanexa. Biji rajane Dioso pejumecovënëtsivijava, xaniavaetsia tsitaponaponare. Cuaicuaijamëre xaniavaetsia. Livaisi ata itsa tsipae-bame, tsipaebare xaniavaetsia. Ponaponare xaniavaetsia. Asivamëre daxitajivi. Najamatabëcopare xaniavaetsia Diosojavabelia pecayavenonaenexa daxitacueneyabara. Ëpexaniacueneyabara najamatabëxainare. Bajarapacuenia itsa tsitaexanaponaponaename, nexata Dioso pejumecovënëtsivi cacuenjëpaeyajinavanapaena. ¹³Tavajënaelia bajarapacuenia exanaponaponare. Jivi penacaetuatsijavata, Dioso pejumelivaisibaxuto tsimuxulebabiabare. Tsipaebaponarena pacuenia jumaitsi Dioso pejumelivaisibaxutota bajarapamonaе pijamatabëcuenesaënexa Diosojavabelia. ¹⁴Dioso baja cajena carajuta pecacajëpaejamatabëcueney xaniavaetsia jivi livaisi netsipaebinexa, pecacajëpaenexanua xaniavaetsia nevetsinexa Dioso pejumecovënëtsivi. Bajaraxua xaniavaetsia najamatabëcueneevetaponaponare. Pamatacabi ancianovi nacaetuata, catsimatanacobeuatsiaya catovajëta Diosojavabelia. Nexata bajarajota Dioso carajuta pecacajëpaejamatabëcueney.

¹⁵Daxita nesaëta evetaponaponare daxita pacuenia caitorobatsi nexanaenexa. Nexata daxitajivi cayapëtaena xaniavaetsia tanejumecovënëtaponaponaejavamë pacuenia caitorobatsi. ¹⁶Pibisiacueneyajivaitaeya ponaponare. Palivaisi ata tsipaebaponame, xaniavaetsia tsipaebaponare. Saicayacuenia pëtsa bajarapalivaisivecua tsipaebaponame. Bajarapacuenia nexanaejava casaëmëre tsaponaponae. Nexata Dioso capanepaena. Pamonaе ata cajumecovënëta netsipaebilivaisi, Dioso capanepaenatsi.

**Pacuenia Timoteo itorobatsi penaponaponaenexa
Dioso pejumecovënëtsivijava yabara pelivaisi**

5 ¹Pëtsa asaëya muxujiobame pamonaе nevajënaeyapijivi. Biji xaniavaetsia yaiyataeya bexacuenia muxujiobare. Necovëpijivi pijinia benejuyapijivicuenia muxujiobare. ²Petiriavi ata nevajënaeyapijivi beenacuenia muxujiobare. Necovëpijivaxi pijinia benejuyapijivaxicuenia

muxujiobare. Ēpexaniajamatabēcuenia taema bajarapovaxi itsajamatabēcuenē bēpēnēa nejamatābēēthētota sivanajamatabēxainaenejevamē.

³Pamona pevecuatēpaevatsi, Dioso pejumecovēnētsiva, yaiyatae-ya yavenonare itsa bitso bejiobi. ⁴Itsiaata baitsi jane pamona pevecuatēpaevatsi, itsa xaina pexi, pemomoxi ata, bajarapamonae xanepana pevetsinexatsi. Bajarapamonae xanepana peyavenonaenexa pijamonae. Bajarapamonae juya beveta paxa, pena ata, pamo ata, pacue ata, pamona vitsatatsi. Bajarapacuenia itsa exana, exana pexaniacuene. Nexata Dioso barēyataenatsi. ⁵Pamona pevecuatēpaevatsi, Dioso pejumecovēnētsiva, itsa apo xainae itsajivi ata pevetsinexatsi, bajarapova najamatabēcuenecopataponaponae Diosojavabelia peyavenonaenexatsi. Navajētabiabi Diosojavabelia matacabita, meravi ata. ⁶Itsiaata baitsi jane pamona pevecuatēpaevatsi pejisipaecuenia pibisiacuene itsa exanaponapona, Dioso tanetsi bepetēpaeva, abaxē asaē tsaponaponae ata. ⁷Bajarapacuenia itorobare Dioso pejumecovēnētsivi pijamonae peyavenonaenexa itsa bitso bejiobi. Nexata pamona Dioso apo pejumecovēnētsivi, toacuenebi tsanetsi pebaracuaicuaijajavatsi bajaraxua yabara. ⁸Dioso pejumecovēnētsivi, pijamonae beveta. Pajivi apo itaxutotsoniatae pevetsinexa pepo pijamonae ata, bajarapajivi apo exanae pacuenia Dioso itorobatsi. Nexata pijamonae itsa apo evetsi, bajarapajivi bitso pibisiacuene exana Dioso apo pejumecovēnētsijivi matatoxenetsia.

⁹Petiriva sesenta pavaibeje pexainaeva, caeto penacojiobicujinae pamona pevecuatēpaevatsi, xanepana pevēnēyaquinarutsinexatsi pamona pevecuatēpaevitsi pevēnēyaquinarubibaxutota. Nexata daxita Dioso pejumecovēnētsivi peyavenonabinexatsi. ¹⁰Pova pamona pevecuatēpaevatsi itsa cueneyapētanetsi pexaniacuene pexanaejava, bajarapova xanepana pevēnēyaquinarutsinexatsi pamona pevecuatēpaevitsi pevēnēyaquinarubibaxutota. Mabaitsi pacuene pexanaeva xanepana pevēnēyaquinarutsinexatsije. Pexi xaniavaetsia pevitsatsiva. Jivi ata itsa sivaxainatsi, xaniavaetsia pijabota pecopiapitsiva. Ajamatabēcuenecovēbia Dioso pejumecovēnētsivi peyavenonaeva. Peyavenonaevanua itsamonae itsa bejiobiaexanatsi Dioso pejumecovēnētsijava yabara. Daxita xua pexaniacuene, pexanaeva, xanepana pevēnēyaquinarutsinexatsi pamona pevecuatēpaevitsi pevēnēyaquinarubibaxutota.

¹¹Itsiaata baitsi jane pova abaxē sesenta pavaibeje apo pexainaeva, pētsa vēnēyaquinarutame nevēnēyaquinarubibaxutota peyavenonaenexatsi daxita Dioso pejumecovēnētsivi. Tsiipaji bajarapova itsa jitsipa pexanaenexa pacuenia natojitsipa, copatsipa Cristo pejumecovēnētsijavami. Nexata icatsia nacojiobijitsipa. ¹²Nexata pijaneconi xainaejitsipa Diosojavabelia. Tsiipaji copatsipa Cristojavabelia penajamatabēcuenecopatsijavami: “Capanepaeya baja jumecovēnētājē Cristo,” jai ata. ¹³Pematatsēnēa bajarapova sivaxainarutsipa itsa bonējava. Afaetabinua tsiipae. Pematatsēnēa

baracuaicuaijai tsabiabi tsipae itsamonae. Jamatabëitonotabiabijitsipa itsamonae. Xuaxi yabara ata apo becuaiicuaijaitsi, cuaiicuaijai tsabiabi tsipae. ¹⁴Bajaraxuata pamona pevecuatëpaevatsi, pova abaxë bitso apo perujuva, jitsipajë icatsia penacobiobijava pexi pexainenexa, pijabo ata xaniavaetsia pevetsinexa. Nexata bajarapacuenia vajanacacueneytoyavi ata toacuenebi tsanetsi pebaracuaicuaijaijavatsi bajarapitsiva. ¹⁵Bajarapacuenia jumaitsinë tsipaji baja itsamonae pamonajivi pevecuatëpaevatsi copaba baja Cristo pejumecovënëtsijavami. Nexata pacuenia dovathi itorobatsi, exanavanapa.

¹⁶Dioso pejumecovënëtsivi, pebijivi, petiriavi ata, itsa pijamonaeyajuvënëva pamona vecuatëpatsi, nexata bajarapamonae bitaxutotsoniatane bajarapova. Bajarapacuenia nexata apo namatavenonae tsane peyavenonænexatsi daxita Dioso pejumecovënëtsivi. Tsipaji baja pijamonaevetatsi. Nexata Dioso pejumecovënëtsivi cajëpaejitsiatsi peyavenonænexa pamona bitso bepejiobivi, pamona pevecuatëpaevatsi pijamonaepetoajibivitsi.

¹⁷Ancianovi, pamona xaniavaetsia evetabiaba Dioso pejumecovënëtsivi, bajarapamonae xaniavaetsia bematamotatsi. Beyaiyatanetsinua. Ancianovi, pamona Dioso pitorobilivaisi bitso tsipaeba, bitso cujarubana, bajarapamonae xaniavaetsia bematamotatsi. ¹⁸Dioso pejumelivaisibaxutota jumaitsi pacuenia bueyu copatatsi pexaejava pexaenexa penacuenebijavata. Jumaitsi mapacueniaje: “Pabueyu canacuenebame trigoxu pecatotanabataxuabinexa, pëtsa pumuxatatame nepumuxatatabiabijavata. Pëtsa pumuxatatame trigoxu pexaenexa pecatotanabataxuabijavata,” jai Dioso pejumelivaisibaxutota. Itsalivaisita pijinia Dioso pejumelivaisibaxutota xaniavaetsia pematamotsijavanexa yabara jumaitsi mapacueniaje: “Penacuenebinë bematamotatsi,” jai Dioso pejumelivaisibaxutota. Bajaraxuata bematamotatsi ancianovi Dioso pejamatabëcueneta bitso penacuenebivi.

¹⁹Pëtsa jumexaniataneme caejivi pepaebijava ancianonë pibisiacuenepexanaejava yabara. Matapania anijajivibeje, acueyabi pajivibeje ata, petaevitsi catsipaebiana, jumecovënëtsianame. ²⁰Nexata xaniajai ancianovi pibisiacuenes ita exanapona, itavere daxita Dioso pejumecovënëtsivi pitabarata. Nexata pijinia itsamonae ancianovi ita cacuenetane nitavetsijava pibisiacuenepexanaevi, cujunaviana pibisiacuenepexanaejava. ²¹Dioso pitabarata, vajatuxanenë Jesucristo ata pitabarata, Dioso pijaängelevi ata pitabarata, xanë jamatabëcuenereviaya caitorobatsi pacuenia caitorobatsi nexanaponaponaenexa. Daxita ancianovi, pibisiacuenepexanaevi, najëpaeya itavetsianame. Ponë ancianonë, bitso pecayapëtaenë, pibisiacuenes ita exana, pëtsa sivaajumeuramë nitavetsinexa pibisiacuenepexanaejava. ²²Pëtsa itsanë ata bepijia exaname ancianonënexa. Tsipaji ponë bepijia ancianonënexa exanaejitsipame, bepijia pibisiacuenes ita

exana, nexata itsamonae cataejitsipa pibisiacuene pexanaevi benejamatabëcueneyavenonaenë. Daxita pibisiacuevecua, xaniavaetsia naevetsiaya ponaponare.

²³ Xamë raja ajamatabëepatanemë tsabiabi. Nexata pëtsa apae-yabiabame ëpitaranae. Tsiquirijavayo vinorayo, pitaranae yajava, apaeyabiabianame.

²⁴ Itsamonae pibisiacuene itsa exana, bananeconitsiaexanatsi daxitajivi pepuacueneyapëtaetsi. Itsamonae pijinia pibisiacuene exanae ata, bepijia apo cueneyapëtaetsi. Bexëa matapania xaniavaetsia vënëlvaisinaitajëta pibisiacuene pexanaejava. ²⁵ Bajara pijinia itsi itsamonae pexaniacuene itsa exana. Pexaniacuene itsa exana, daxitajivi cuenetanetsi pexaniacue-ne pexanaejava. Itsajavata pexaniacuene exanae ata, jivi apo cuenetaetsi. Itsiata baitsi jane bajarapajivi pexaniacuene itsa exana, acuenebi navënë-matayatsia peponaponaejava. Nexata bexëajavabelia daxitajivi vënëlvai-sitanetsi pexaniacuene pexanaejava.

6 ¹ Pamonaе dajubicuenia canajetatsi itsamonaejavabelia amoneya petonacuenebabiabinexa, bajarapamonae Jesús pelivaisi itsa pejumecovënëtsivi, yaiyataeya tonacuenebi pijatuxanenë. Bajarapacuenia tonacuenebi pijatuxanenë pesivajamatabëcuenebarëyanexatsi. Nexata pijatuxanenë Dioso pibisiacuenia apo baracuaicuaijai tsane. Jesús pelivaisi ata, palivaisi vaxaitsi jivi tsipaebaponatsi, pijatuxanenë pibisiacuenia apo baracuaicuaijai tsane. ² Dajubicuenia pecanajetsivitsi pijatuxanenë, Dioso itsa pejumecovënëtsinë, pecanajetsivitsi pëtsa jamatabëjumaitsi pijatuxanenë yabara mapacueniaje: “Tajatuxanenë rabaja abaxë Dioso pejumecovënëtsinë. Nexata asaëyata apo tonacuenebi atanë tsane, itsiata apo nebijatae tsane,” jamatabëjai pëtsa. Biji rajane asaëya xaniavaetsia tonacuenebi pijatuxanenë. Tsipaji raja Dioso pejumecovënëtsinë yavenonaeya tonacueneba Dioso penajuaasivavitsiyajuvënënenë. Bajarapalivaisi tsipaebaponare. Itorobarenua bajarapacuenia pexanavanapaenexa.

Pacuenia Dioso pejumecovënëtsijivi jamatabëcuenebarëya yabara pelivaisi

³ Itsamonae saicaya itsalivaisi tsipaebapona. Bajarapalivaisibeje apo najamatabëcuenejëpaebeje palivaisi vajatuxanenë Jesucristo tsipaebapona. Palivaisi vaxaitsi jumecovënëtavanapatsi, apo nalivaisijëpaebeje. ⁴ Cueneyapëtanetsi pamonaе penajumetsënëtsilivaisi tsipaebapona. Bajarapamonae beayaijamatabëcuenevi itajara natane. Itsiata bajarapamonae pexaniajailivaisi apo yapëtae. Bitso bepematajemabivitsi jinavanapa. Nexata bajarapamonae jitsipabiaba itsamonaejavabelia pejumeanaeyanotabiabinexa saya jema itsacuenelivaisixi peyanijobijavata. Apo barënajamatabëcuenejëpae itsajivi ata. Bajarapamonaeyajuvënëvi itsa xaina itsacueneyavayo, bajarapamonae nacobecaëbabiaba. Anaepanabiaba.

Nabijataeyabiaba. “Itsamonae covë nitsacueniabijitsia,” jamatabējai tsabiabi, itsamonae apo itsacueniabijitsia atatsi. ⁵Bajarapamonae anae-ya namataenetsia najumenotabiaba. Tsipaji piagamatabēcuenebejevi. Bajarapamonae pexaniajailivaisi, Cristo pelivaisi, apo yapëtae xaniavaetsia jivi petsipaebinexa. Saya bajarapamonae jamatabėjumai tsabiabi: “Xanë raja Dioso pejumelivaisi tatsipaebaponaexae, palata nacanabianajë,” jamatabējai tsabiabi bajarapamonae. Bajarapitsivi nayajivitsare. ⁶Vaxaitsi Dioso vajajumecovënëtsivi, bitso cajena vajaxainaevi Diosojavabelia, itsa sivajamatabēcuenegarëyatsi xuayovajëto Dioso nacetocopata vajaxainaenexa mapanacuataje. ⁷Pamatacabi vaxaitsi naexanatsi mapanacuataje, itsacuenejavayo ata apo capatsitsi. Pamatacabi pijinia tēpaenatsi, apo caponae tsanetsi itsacuenejavayo ata mapanacuapijicue-neje. ⁸Bajaraxuata nexata itsa xainatsi vajaxaejava, vajanaxatabijava ata, besivajamatabēcuenegarëyatsi. ⁹Itsia baitsi jane pamonae najamatabë-xaina ëpexainaejavanexa, bajarapamonae dovathi jamatabēcuenecëtatsi. Nexata pibisiacue exana palata pepitsinexa. Jamatabēcuenebijianatsi. Nexata bajarapamonae Diosovecua naxuabiaya jinavanapa. ¹⁰Pamonae bitso palata jitsipa, daxita xua pibisiacue exana palata pepitsinexa. Itsamonae bitso najamatabëxaina ëpexainaecue pexainaenexa. Nexata baja copaba Dioso pejumecovënëtsijavami. Nexata bajarapajamatabēcue-ne bëpënëa bitso vajamatabēcuenebējai.

**Pacuenia Timoteo muxujiobatsi piagamatabēcuenesaënexa
Diosojavabelia penajamatabēcuenecopatsijava yabara pelivaisi**

¹¹Timoteo, xamë Dioso pijajivitonëmë. Navecuatsare mapanacuata jivi palata pejitsipaejamatabēcue. Biji jane ajamatabēcuenesaëmëre Dioso nejumecovënëtaponaponaejava. Dioso asivamëre. Diosojavabelia najamatabēcuenecopatsiaya ponaponare. Itsamonae ata asivamëre tsaponaponae. Itsamonae caitsacueniababiabi ata, bajayajebi casaëmëre tsaponaponae Dioso nejumecovënëtaponaponaejava. “Xanë ayaijamatabēcuenenënë,” nejaiyaniva, beveliajamatabēcuenenë nataeya ponaponare. ¹²Catoayapëbeje ata Diosojavabelia nenajamatabēcuenecopatsijava, ajamatabēcuenesaëmëre nepitsinexa xua Dioso carajutsijitsia, matacabi apo peverevereaejava. Pamatacabi navajunupaebame nejumecovënëtsijava Jesús Dioso pexënatocuene, Dioso cajunata pecarajutsinexa matacabi apo peverevereaejava. Ayaibitsaëtoxaneto Dioso pejumecovënëtsivi pitabarata, Dioso cajunata pecarajutsinexa matacabi apo peverevereaejava. ¹³Dioso baja cajena pesaëta daxita vaxaitsi asaë tsavanapaetsi. Pamatacabi Jesucristo nutatsi Poncio Pilato pitabarata, ajumejunavijibia navajunuapaeba pexaniajailivaisita. Nexata Diosobeje Jesucristobeje pitabarata caitorobatsi aeconoxae mapacueniaje. ¹⁴Caitorobatsi xaniavaetsia nejumecovënëtaponaponaeenexa daxita pacuenia jumaitsi pexanialivaisi,

Cristo pelivaisi. Nexata acuenebi tsane itsajivi ata pecaitavetsinexa. Bajarapacuenia vajënaeetaponaponare vajatuxanenë Jesucristo matapania pepatsimatacabitsicajavabelianexa. ¹⁵Pamatacabi Dioso caëjëta, itsa copiapatsiana, Cristo icatsia patsianica. Caenë Dioso bitso ayaijamatabëcuenenë daxitanacuanë pevetsivivecua. ¹⁶Caenë Dioso apo tēpae tsane daxita matabibijavabelianexa. Dioso peyacotiyaponaponaenë. Bajaraxuata itsajivi ata acuenebi pimoxoyotsijava Dioso. Itsajivi ata cajena caeto ata apo tae Dioso. Tsipaji apo caëjēpaetsi petaejava. iDaxitamatacabi Dioso pijajivi yaiyatanetsi! iDioso cajena ayaijamatabëcuenenë daxitamatacabijavabelianexa!

¹⁷Pamonae bitso pexainaevi mapanacuapijicueneje, bajarapamonae muxujiobare beayaijamatabëcuenevi penataeyaniva. Muxujiobarenua pejamatabējumaitsiyaniva: “Palata baja taxainaexae, apo namatave-nonaenë itsacuenēja ata,” pejamatabējaiyaniva. Tsipaji saya palata pevereverecejave. Biji rajane itorobare bitso pexainaevi penajamatabëcuenecopatsinexa piasaëtsaponaponaenë Diosojavabelia. Dioso nacarajuta daxita vajaxainaejava barëyaya vajacajinavanapaenexa. ¹⁸Itorobarenua bajarapamonae pijapalata pecanacuenebinexa, itsamonaejavabelia pexaniacuene petoexanabiabinexa bajarapapalatata. Itorobarenua penajamatabëcueneveretsinexa palata perajutsinexa bepejiobivijavabelia, bajarapacuenia peyavenonaenexa. Itorobarenua petsicobetsanaponaenexa pexainaejava bepejiobivijavabelia. ¹⁹Bajarapacuenia itsa exanaena, nexata athëbëtatsia Dioso tobataponaenatsi pepacuene penamatamotsijava pexainaenexa daxitamatacabijavabelianexa. Xainaenanua matacabi apo pevereverecejave.

**Pacuenia Pablo Timoteo pemuxujiobilivaisi toyaquina,
pecopatsivajënae petoyaquinaelivaisi mapabaxutotaje, yabara pelivaisi**

²⁰Timoteo, exanaponaponare daxita xua Dioso catocopata nexanaenexa. Pëtsa namuxunaetame pamonae bitso pecuaicuaijaivi saya mapanacuapijicuene yabaraje. Pëtsa namuxunaetame pecuaicuaijaivi natsiquejermalivaisixi. Pëtsa namuxunaetame pamonae jivi tsipae-bapona penajumetsënëtsilivaisi. Bajarapamonae tsipaebapona itajara pepacuene bepexaniajailivaisi. Itsiata cajena apo pexaniajailivaisi. ²¹Itsamonae bajarapalivaisi jumecovënëta. Nexata baja copaba Dioso pejumecovënëtsijavami.

Catovajëtatsi Dioso pecayavenonaenexa.